

Regional News Unit AIR Aizawl
Thursday, January 29, 2026
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

- Home Minister Pu K.Sapdanga leh Information & Public Relations Minister Pu B. Lalchhanzova ten kumin Republic Day lawmna inkhawma chanchinbumite telloh chhan leh an lungawilohna te sorkar official te an sawi pui.
- Mizoram Youth Commission Chairman Pu Malsawmzuala'n lehkhabu tam zawk a nih theih nan smartphone, TV leh computer en zat, screen time tih tlem a tul hle tih a sawi.
- Prime Minister Narendra Modia chuan India leh EU ten Free Trade Agreement an siam chu India startup te tan awlsam zawkin sum hmuhna kawng a siam ang a a ti.
- Vawiin Parliament Budget Session ah Economic Survey pharh a ni dawn.

<><><>

HM

Home Minister Pu K.Sapdanga leh Information & Public Relations Minister Pu B. Lalchhanzova ten nimin khan kumin Republic Day lawmna inkhawma chanchinbumite telloh chhan leh an lungawilohna te sorkar official te a sawi pui a

Home Minister Pu K.Sapdanga chuan Republic Day lawmna inkhawm leh “Governor’s At Home” a tel lova, chanchinbumite’n lungawi lohna leh harsatna an nei chu pawl a tih thu sawiin, Republic Day leh Independence Day-ah Media enclosure siam ziah tawh nise an ti a, sawmna semchhuah chungchangah pawh fimkhur lehzuala kalpui nise an ti bawh.

He hunah hian IPRP&S Secretary Pi Betsy Zothanpari Sailo, Aizawl Bawrhsap Pu Lalhriatpuia, State Protocol Officer Pu Lalmuansanga Ralte, DIPR Joint Director pahnih – Pi Mina Zoliani Joute leh Pu Malsawmsanga, DIPR Deputy Director Pu Andrew H. Lalremruata te an tel a ni.

<><><>

CHILD RIGHTS

School Education Department hnuaia thawktute pualin naupangte himna leh an dikna chanvo chi hrang hrang zirhona Conference on Key Child Rights Issues chu nimin khan neih a ni.

He zirhona hi National Commission for Protection of Child Rights leh Directorate of School Education thawk dunin an buatsaih niin, ATI Auditorium MINECO, Aizawl-ah neih a ni a, he zirhonaah hian naupangten an zia an thlakin ngaihthah lova, kawm Chiang Tur leh Khawih Chhiat an nih chuan an kekawrte leh thawmhnaw te su fai mai lova vawnthat tur a nih thu te leh, naupang thiltisual chu Juvenile Justice Board hmaah hruai tur a nih thu te sawi a ni a. Naupangte an chhungte leh an bul hnaia awmtan mihring hmanga sumdawnnaa an hralh dan leh an nawr luih dan te, Zirna ina thawkte hriat tur chi hrang hrang chu he huna mithiam sawm, Civil Judge Pi F.Laltlansangi, WCD Principal Programme Manager Pi Amy Lalrinpuii, Additional SP CID (Crime) Pi PC Liansiampuii, SCERT Lecturer Pi Zozikpuii leh SDEO E&W School Education Pi Caroline Rinthanpuii Fanai ten an sawi a ni.

He hunah hian School Education Secretary Pu David Lalthantluanga chuan naupangte dikna leh himna chu zirna Inah kenkawh ngei ngai a ni tih sawiin, Juvenile Justice Act leh POCSO Act te chu zirna in hrang hrangten hriatchian a pawimawh thu te, school leh a chhehvel chu Zirlaite tan hmun him ni tura vawn a pawimawh thu te a sawi a. School Education Director Pi Angela Zothanpuii pawhin naupangte chungah thil fello leh tha lo tam tak thleng thei thei te chu dan leh hrai hmangin engtinngan humhim ang tih leh Naupangte himna mai bakah tawhsual an tawhin engtia hmalak tur nge tih te hriat a ngai a ti a, naupangte zirtir mai bakah venhim chu sikula thawkte tih tur a nih thu a sawi a. MSCPCR Chairperson Pu Jimmy Laltlanmawia chuan naupangte chu an hmalam hun ringawt ngaihtuah lovin tuna an dinhmun mek ngaihtuah a ngai a ti a. School thenkhat chuan naupangte dikna chanvo an ngai pawimawh lo tih sawiin, School himna an zirchiannaah sorkar sikulte chu average chunglamah an awm chu lawmawm a tih thu a sawi ni.



MYC

MYC Chairman Pu Malsawmzuala'n lehkhabu tam zawk a nih theih nan smartphone, TV leh computer en zat, screen time tih tlem a tul hle tih a sawi.

He thu hi Mizoram Youth Commission (MYC) in ram pum huapa Lehkhabu Chhiar inelna, Reading Decathlon-a 2-na Mount Carmel School, Chaltlang atanga tel pahnih-Krista Roluahpuia Khiangte Pawl 9 zirlai leh Rebek Malsawmzuali Pawl 7 zirlai leh La Montessori School, Mission Veng atanga tel pahnih- Malsawmhlui Pachuau pawl 8 zirlai leh Joshua Lalawmpuia Pawl 8 zirlai te chawimawina an hlannaah sawiin, MYC Chairman chuan screen en nasat chu zirlai tan a tha lo hle a, naupang mai ni lovin puitling te pawh an mut tlem phah hle a ti a, tunlaiah internet leh youtube chu nau awihna atana an hman nasat avangin mi nawlpui chuan lehkhabu lam an hawi loh phah hle a ti a, lehkha chhiar uar a, lehkhabu chhiar tam a tul hle tih a sawi a. Lehkhabu chhiar lamah hmasawn a nih zel theih nan MYC chuan hma an la mek tih sawiin, nikum December ni 15-a Read Fest an buatsaih chu hman zel an tum a ti a, kumin lamah pawh Reading Decathlon buatsaih a nih leh chuan MYC chuan Mizoram a zirlaite an tel leh theih nan theihtawpin ruahmanna an siam leh dawn tih a sawi a ni.

MYC Chairman Pu Malsawmzuala

Puan tawh angin, ram pum huap Reading Decathlon hi Food4Thought Organisation leh Monocept te tangkawpin an buatsaih a ni a, MYC hmalakna in First Round chu nikum August ni 22—ah khan Online mode hmanga neih a ni a, he round-ah hian North East region aiawh turin Mount Carmel School leh La Montessori School te thlan an ni a. Nikum November ni 29 khan Indore, Madhya Pradesh a neih Regional Round chu School pahnih te hian paltlang lehin, kumin January ni 17 khan National round hmachhawnin, India ram pumah Mount Carmel zirlaite chu 2-na niin, La Montessori zirlaite chu 3-na a ni.



RESHAM KRISHI MELA

Sorkar laipui Ministry of Textiles hnuaia Central Silk Board leh state Sericulture Departmentte huaihawtin Sericulture Farmers-te ni ‘Resham Krishi Mela’ chu Sericulture Training Institute Zemabawk-ah nimin khan buatsaih a ni a, Sericulture Minister Pu Lalthansanga’n hun hmanpuiin Pi Florence Zotluangpuii, Secretary, Sericulture Department chuan hun a kaihruai a, Sericulture farmer mi 100 chuang leh entrepreneur leh official te an kalkhawm a ni.

Minister Pu Lalthansanga chuan thu sawiin Mizorama Sericulture khai dingtu ber chu thingtlang hmuna Maimaw pangang khawitute an nih thu a sawi a. Bana kaih Policy hnuaiah Chief Minister Pu Lalduhoma hoin chak taka ke pen a nih mek thu sawiin, Sericulture Department thuam chak nan pawh hmalak reng a nih thu leh chak zawka hna thawh a nih theih nan thawktu mi thar pawh lak belh an nih thu a sawi bawk. Farmer te chu thahnem ngai taka thawk tur leh teirei peihna nei turin a fuih a, Resham Krishi Mela tangkai taka hmang turin duhsakna a hlan bawk a ni.

He hun hmannaah hian Mizorama Maimaw pangang khawia hmasawnna tur kawng hrang hrangte leh technical lam hawia farmer-te hmasawnna turte an sawi a; zawhna leh chhanna hun te hman a ni.

Resham Krishi Mela-in a tum ber chu, Maimaw pangang khawi hmanga thingtlang mite’n eizawnna ngelnghet an neih theihna tur kawng inkawh hmuh te, farmer-te leh Technical staff te inkara thawh hona tha siamte leh kawng hrang hranga sericulture hmasawn zelna tur atana hmalakte a ni.



MZP

Mizo Zirlai Pawl MZP-in zirna in leh zirlaite inkarah thiamna tak tak a lanchhuah theihna turin pawl 10 leh 12 board exam result bua tarlan loh aiin, exam pattern leh question siam dan ngun taka ennawn zawk turin thuneitute an ngen.

Nimina MZP President Dr. C. Lalremruata hova MZP General Headquarters Executive Committee Meeting vawi 649-na neihah Mizoram sorkar in a By-heart system tihbo nan a HSLC leh HSSLC Top-10 leh Division tarlan a nih tawh loh tura ruahmanna an siam chungchang an sawiho a, Mizoram sorkan hmalakna thar tur chu ngun taka ngaihtuah tha a, zirlaite leh zirnain inkarah inelna thianghlim zawk a awm

zel theihna turin Top-10 tarlang leh turin leh, zirna in leh zirlaite inkarah thiamna tak tak a lanchhuah theih nan exam pattern leh question siam dan chu ngun taka ennawn zawk turin thuneitute a ngen a ni.

Hei bakah hian Forest Conservation Amendment Act, 2023 (FCAA) chu Mizoram leh hnam tana thalo leh Mizo hnam kal zel tur atana himlo a nih avangin Mizoram Assembly in he dan hman theiha a lo pasd tawh chu sut leh ngei turin MZP chuan thuneitute an ngen a, Mizoram University Finance Officer tunhnaia lak chungchang pawh ngaihtuahin, Mizoram a zirna in sang berah dan palzut na tam tak awma hnalak a ni chu hriatthiam har an tih thu sawiin, hetiang thil hi a thlen nawn tawh loh na tur leh MZU zahawmna humhim a nih theihna turin MZP chuan a tul angin hmalak a rel a. Mizoram-a Central Institution hrang hrangte chu dan dik taka hnalak kalpui thin turin an ngen bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

REIEK TOURISM BOOST

Mizoram Rel a lo luh atangin khualzin an pung nasa hle a, Reiek tlang tlawhtu pawh nasa takin an pung.
Kan corr thudawn danin, Gate vengtu ten an chhinchhiah danin nikum December thla khan mikhual 17000 vel awmin nichhuak en tur nitin mi 500 vel leh tlai ni tla tur en leh puaninkaih a riak leh home stay a thleng engemawzah an awm a, Reiek khua tlawh hrim hrim chhinchhiah loh te nen mi 20,000 vel an tling a ni.

Gate pui bul a Green Hill Restaurant neitu Pu Sangpuia chuan gate paltlang man hi puitlingah Rs 30 leh naupangah Rs 20 ani tih sawiin motor 5/6 vel service a awm bawk a ti a, Gate luhman atanga sum hmuh hi an khawtlang cheibawl nan hman thin a ni a ti. Hetihual hian a panna kalkawng chhe lutuk chu Sorkar in siam tha thei se an duh tih sawiin kawng a chhiat chuan lirthei hman man a to a, hei hian Tourist te a hnar phah a hlauhthawnawm a ni a ti.

Reiek khawtlang chuan he tlang hi theihtawp a enkawlin chhungkaw engemawzat in eizawn nan an hmang mek a ni. Mikhual riahna leh chaw ei tur te, hmawmsawm chi hrang hrang leh intur, zupui leh zufang te, lirthei a hruai kual vel tu te awmin sum engemawzah an la lut a ni.

<><><>

PRESIDENT

Vawiin Parliament Budget Session ah Economic Survey pharh a ni dawn. Nimin Session tan niah President Droupadi Murmu-i chuan house pahnih member thukhawm hmaah he thu hi sawiin mitinin nitin khawsaknaah an chanvo diktak an neih theih nan sawrkarinj theihtawp a chhuah a ti a.Pi Murmu-I chuan mi rethei vaibelchhe 25 chuang kum 10 kalta chhungin chawikan an ni a ti. Sawrkarin term thumna a hman mekah hian mi retheite dinhmun chawikang turin chakna thar nen hmalak a ni a ti a. Kum 2014 ah khan social security scheme ten khua leh tui vaibelchhe 25 chauh a thlen phak laiin sawrkar tan lakna a zarah tunah chuan vaibelchhe 95 in social security scheme te hi an dawng tawh a ni a ti bawk.

Operation Sindoor chungchang sawilangin sipaite fakawm a tih thu a sawi a. Ramin a neih hmanruate hmangin firfiakte inkulhna hlawhtling taka tihchhiat a ni a ti bawk.

<><><>

PRAGATI

Prime Minister flagship programme Pro-Active Geovernance and Timely Implemetation,PRAGATI chuan mellung pawimawh tak phunin a tum 50 na inhmuhkhawm hlawhtling takin a nei. He programme hi PM Modian kum 2015 a bul a tan atangin sawrkar inrelbawl na leh hnathawh dana inthlak danglamna tam tak a thleng a. Sawrkar hnathawkte hna thawh dan chu a hunlai ngeia vil a ni a, Prime Minister hoa thlirletna hun hman thin niin hetah hian hmasawanna ruhrel pawimawh tak tak te pawm niin mipuiten lungawilohna an thlente pawh enfiah nghal a ni a thin a. Kum 10 chhungin PRAGATI hian sawrkar thutlukna pawimawh tak takah nasa takin a pui a, hmasawanna hna thawh tikhawtlai thinte chin fel niin sawrkar hnathawkte rintlak lehzuala siam an ni.

PRAGATI hnuaia project hlawhtling zingah Karanataka-a Super Thermal Power Project hi a tel a. He project hi NTPC Limited hmalakna niin lungalhthei behchhana kawlphehta siamchhuahna tur project niin Karnataka-a Vijayapura district a siam a nia . India chhim lama NTPC project lian berte zinga mi a ni. Hetiang taka project pawimawh anih avang hian PRAGATI hnuaiah Prime Minister Narendra Modia hoin June ni 24 2025 khan thlirho a ni a. Railway te nena thawhhona tha tak hnuaia tihpuitlin ngai anih avangin Pu Modia hian railway thuneitute pawh project hlawhtlin theih nana tan la turin a chah a. Hetianga chak taka hmalak anih avang hian kum 2018 December ni 3 khan hawn alo ni ta a ni.

<><><>

PM

Prime Minister Narendra Modia chuan India leh EU ten Free Trade Agreement an siam chu India startup te tan awlsam zawkin sum hmuhna kawng a siam ang a, India in thil a siamchhuahna lamah sum a ti pung ang a ti. Nimina New Delhi-a Cariappa Parade Ground-a National Cadet Corps(NCC) PM Rally ah he thu hi sawiin Pu Modia chuan India in ram engemawzat te nen sumdawnna lama inremna a ziahpui tawh a ti a.

Heng ram zingah hian Oman, New Zealand, UK, UAE, Australia, leh Mauritius te an tel a ti a. Heng inremna te hian ramchhung thalaite tan hna tam tak a siam sak dawn a ni a ti bawk.

<><><>